

Gurau biar patuh syariah

“USTAZ bergurau ke betul-betul ni? Anak Ustaz lahir 1 April?”

Tersentak saya seketika apabila mendapat panggilan daripada seorang kawan bertanya kesahihan berita kelahiran puteri kedua saya, Asma Sofiah pada 1 April 2002.

Benar! Itulah tarikh lahir puteri saya, tetapi ramai yang ingat saya cuma bergurau.

Itulah hakikat yang berlaku setiap kali menjengah awal bulan April. Istilah *April Fool* akan dikumandang seolah-olah manusia perlu diperbodohkan dengan gurauan pelik sebagai melengkapkan kalender tahunan mereka. Tambah malang apabila ada segelintir Muslim turut sama menjadi jahil terpalit perkara ini.

Saya tidak mahu mengulas ‘asal surat beranak’ istilah atau budaya itu, cuma apa yang pasti budaya gurau senda perlu dilihat menurut kaca mata Islam agar menjadi kunci syurga dan bukannya saham ke neraka.

Antara karya moden mengulas isu ini adalah buku bertajuk *al-Muzah Fil Islam* atau *Gurauan Menurut Islam* tulisan pengajar di Universiti Raja Su’ud, Riyad, Arab Saudi, Prof. Dr. Abdul Ghani Abu Ghuddah.

Islam tidak melarang senda gurau yang biasa berlebar dalam kehidupan manusia. Inilah cantiknya Islam sebagai syariat manusawi. Tidak dinamakan manusia jika hidupnya kosong tanpa gurau, ketawa, gembira, sedih, tangis dan pelbagai cerminan emosi lain.

Allah sendiri tegaskan bahawa ketawa dan tangis antara bukti kehebatan-Nya maksudnya: “Sesungguhnya, Dia (Allah) lah yang menyebabkan (seseorang itu bergembira) tertawa, dan menyebabkan (seseorang itu

Refleksi *al-quran*

Oleh ABDULLAH BUKHARI
ABDUL RAHIM
AL-HAFIZ

Pensyarah di Jabatan Tilawah al-Quran, Pusat Bahasa, UIAM dan Timbalan Presiden Murshid.



berduakacita) menangis.” (al-Najm 53: 43)

Kita mungkin tersentak seketika apabila tahu bahawa gurauan boleh menjadi sebab bahagia atau duka di akhirat kelak. Kalau kena cara gurauannya, kegembiraan yang berputik daripada senda menjadi sebab ikatan silaturahim dan persaudaraan Islam semakin kukuh.

Pastinya ia menjadi saham ke syurga. Manakala jika senda gurau menyebabkan runtuhnya ikatan silaturahim dan persaudaraan Islam, ia akan menjadi stok dosa yang menyempitkan laluan manusia ke syurga.

Rasulullah selalu bergurau bagi menaikkan cera orang. Bahkan baginda pernah bergurau dengan seorang kanak-kanak yang selalu bermain dengan anak burung kesayangannya.

Anas bin Malik r.a. menceritakan ertiinya: “Rasulullah SAW adalah orang paling baik akhlaknya. Aku ada seorang adik kecil digelar dengan nama Abu ‘Umair. Aku kira usianya baru lepas susuan (3-4 tahun). Setiap kali Nabi datang menziarahi kami, Baginda akan bergurau dengan adikku sambil bertanya: “Wahai Abu ‘Umair! Apa yang dilakukan oleh si anak burung (mu)?” - Sahih Bukhari dan Muslim

BATAS GURAUAN

Berikut disenaraikan beberapa syarat mudah sebagai penanda aras patuh syariah dalam apa sahaja bentuk gurauan:

1 Tidak mempersendakan isi agama

Agama bukanlah bahan gurau. Silap bergurau dengan isi agama boleh mendatangkan musibah dosa yang berat. Tambahan pula ia menjadi celaan Allah kepada orang munafik:
Ertinya: “Dan jika engkau bertanya kepada mereka (tentang ejek gurau mereka) tentulah mereka (orang munafik) akan menjawab: “Sesungguhnya kami hanya berbual dan bermain”. Katakanlah: “Patutkah nama Allah, ayat-Nya serta Rasul-Nya kamu persenda dan ejek?” (al-Tawbah 9:65).

2 Tidak berdusta

Mungkin ada berkata apa salahnya sedikit dusta dalam gurauan bagi menceriakan suasana. Islam menegaskan matlamat tidak menghalalkan cara.

Rasulullah mengingatkan umat Islam dengan bersabda: “Celaka (binasalah) bagi orang yang berbicara secara berdusta untuk menimbulkan gelak tawa orang. Celaka baginya! Celaka baginya!” - Sunan Abu Dawud

Juga sebuah hadis lain maksudnya: “Para sahabat berkata: “Wahai Rasulullah! Tuan pun bergurau dengan kami?” Baginda menjawab: “Aku tidak berkata (walaupun dalam gurauan) melainkan yang benar sahaja.” - Sunan Tirmizi

3 Tidak mengejutkan atau menakutkan orang

Pernah para sahabat bermusafir bersama Rasulullah. Apabila mereka singgah di satu tempat, beberapa sahabat bergurau dengan mengambil barang milik seorang lelaki yang sedang tidur.

BERGURAU senda mampu memceriakan dan mengeratkan hubungan sesama insan, namun ada hadnya. - GAMBAR HIASAN

AHLAN YA RAMADAN

Persiapan Ramadan

- RAMADAN bagaikan pesta ibadah bagi seseorang Muslim yang benar-benar menghayati dan merasai kenikmatan ibadah sepanjang bulan mulia itu.

- Di kala siang hari kita menahan diri daripada lapar dan dahaga di samping mentarbihkan anggota pancaindera lain agar turut ‘berpuasa’ daripada melakukan perkara keji, dosa dan melalaikan.

- Sudah tentu kita tidak mahu menjadi golongan yang hanya berpenat lelah sahaja dalam ibadah sebagaimana hadis Rasulullah bermaksud, “Berapa ramai daripada orang yang berpuasa tiada baginya ganjaran daripada puasanya melainkan lapar sahaja. Berapa ramai daripada orang yang bangun (mendirikan solat pada malamnya) tiada baginya ganjaran daripada bangunnya itu melainkan berjaga malam semata-mata.” - Riwayat Ahmad

- Justeru, antara persiapan menjelang Ramadan:
 - Mengulang kaji ilmu tentang puasa.
 - Membaca kembali hadis-hadis Nabi SAW tentang fadilah puasa dan bulan Ramadan.
 - Mengetahui amalan-amalan utama dan besar pahalanya pada bulan Ramadan.

■ Sumber buku Soal Jawab Puasa, Solat Tarawih, Zakat Fitrah & Hari Raya (Telaga Biru Sdn. Bhd.)

